

E siman aki

Fabuloso buki na papiamento riba plaza "Ora Algo Bay Robez"

ORANJESTAD (AAN): Siman pasa DIARIO tabatin e primicia di informa tocante un tremendo buki cu lo ta riba plaza local dentro di algun dia. Sin exageracion e buki nobo aki ta priminti di ta un di e mihor bukinan produci na nos propio idioma y cu ta apto pa tur hende.

Ta trata di un obra magistral skirbi den un Papiamento simpel y comprendibel y hasta cu leternan suficiente grandi pa haci lesamento hopi facil y atractivo.

Autor di e tremendo obra aki ta e conocido sicologo Tony Green. Ta fresco ainda den nos memoria e tremendo impacto cu su buki riba menopausa a haci tur caminda rond Aruba un poco

mas cu un aña pasa. Awor esun aki parece lo bay ta hopi mas impactante cu esun prome. Green ta pone riba mercado un buki cu delaster persona lo bay kier tin den su coleccion di bukinan informativo.

Diahuebs atardi e siman aki, den presencia di un grupo di invitadonan special, Tony Green lo estrena su buki cu ta carga e titulo interesante di **ORA ALGO BAY ROBES...Con Pa Reconoce Ora Mucha y Adulto Tin Problema y Kico Pa Haci!**

E buki nobo aki, cu su mas di 200 pagina y 18 capitulo ta berdaderamente un obra fenomenal cu informacion masha al caso, relevante pa tur hende y skirbi di tal manera cu tur por compronde. Green ta bolbe demonstra su tremendo abilidad pa tuma un materia hopi complica y trece den un forma comprendibel pa tur.

Biblioteca Nacional na Playa lo ta sede di e lanzamiento di e tremendo obra aki y mes ora lo bay over na cuminza cu e benta di e buki. Tur indicacion tin cu esaki lo bay manera pan cayente. Mirando e interes grandi cu lo bay tin pa e buki aki su imprenta a conseha Green pa bini cu un cantidad mas grandi pa tur hende lo por haya, pero nos a compronde cu asina mes e cantidad imprimi lo keda poco pa e acogida cu e buki aki lo haya. Nos simpel conseho...busca di bo mes ora pa bo na keda afo.

Gruponan cu sigur lo kier apodera di un di e bukinan aki ta esnan cu ta traha cu mucha sea den un crèche of hospitaal, maestronan di school o futuro maestronan di school, amanan di cas y mayornan en general.